

四庫全書

集部

欽定四庫全書

集部

花菴詞選續集卷八至十

詳校官編修臣周瓊

侍讀臣孫球覆勘

總校官知縣臣繆琪

校對官主事臣陳墉

謄錄監生臣陸恩綬

欽定四庫全書

花菴詞選續集卷八

宋 黃昇 撰

宋詞

劉叔安

名鎮號隨如兄弟皆以文鳴有隨如百詠刊

於三山

沁園春

和劉潛夫送孫花翁韻

誰似花翁長年湖海蹇驢弊裘想紅塵醉帽青樓小扇

揮金談笑惜玉風流吳下阿蒙江南老賀肯為良田二
頃謀人間世算到頭一夢螻蟻王侯悠悠吾道何求
況白首相逢記舊游記疎風淡月寒燈古寺平章詩境
分付糟邱聚散搏沙炎涼轉燭歸去來今萬事休無和
有問從前那箇騎鶴揚州

又

題西宗雲山樓

爽氣西來玉削羣峰千杉萬松望疎林清曠晴烟紫翠
雪邊迴棹柳外聞鐘夜月瓊田夕陽金界倒影樓臺表

裏空橋陰曲是舊來忠定手種芙蓉 仙翁心事誰同
付魚鳥相忘一笑中向月梅香底招邀和靖雲山高處
問訊梁公物象搜奇風流懷古消得文章萬丈虹沈吟
久想依依春樹人在江東

花心動

臨安新亭

鳩雨催晴徧園林一番綠嬌紅媚柳外金衣花底香鬚
消得艷陽天氣障泥步錦尋芳路稱來往縱橫珠翠笑
攜手旗亭問酒更酬春思 還記東山樂事向歌雪香

中伴春沉醉粉袖殢人彩筆題詩陶寫老來風味夜深
銀燭明如晝待歸去看承花睡夢雲散屏山半熏沈水

漢宮春

鄭賀守席上懷舊

日軟風柔望煖紅連島晴綠平川尋芳拾藥勝伴陌上
鮮妍玉驄歸路記青門曾墮吟鞭人去後庭花弄影一
簾香月娟娟追念舊遊何在歎佳期虛度錦瑟華年
博山夜來燼冷誰換沈煙屏幃半掩奈夢雲不到愁邊
春易老相思無據閑情分付魚牋

水龍吟

丙子立春懷內

三山臘雪才消夜來誰轉回寅斗試燈簾幕送寒幙勝
暗香攜手少日歡娛舊遊零落異鄉歌酒到而今生怕
春來太早空贏得兩眉皺春到蘭湖少住肯殷勤訪
梅尋柳相思人遠帶圍寬減粉痕消瘦雙燕無憑尺書
難表甚時回首想畫欄倚徧東風閒負却桃花呪

又

庚寅寄遠

老來慣與春相識長記傷春如故去年今日舊愁新恨

送將風絮粉淚羞紅黛眉顰翠推愁不去任瑣窗深閉
屏山半掩還別有愁來路 回首畫橋煙水念故人匆
匆何處客情懷遠雲迷北樹草連南浦離合悲歡去留
遲速問春無語笑劉郎不道無桃可種苦留春住

又

丙戌清明和章質夫韻

弄晴臺館收煙候時有燕泥香墜宿醒未解單衣初試
騰騰春思前度桃花去年人面重門深閉記彩鸞別後
青驄歸去長亭路芳塵起 十二屏山徧倚任蒼苔點

紅如綴黃昏人靜暖香吹月一簾花碎芳意婆娑綠陰
風雨畫橋煙水笑多情司馬留春無計濕青衫淚

慶春澤

丙子元夕

燈火烘春樓臺浸月良宵一刻千金錦步承蓮彩雲簇
仗難尋蓬壺影動星毬轉映兩行寶珥瑤簪恣嬉遊玉
漏聲催未歇芳心 笙歌十里跨張地記年時行樂憔悴
而今客裏情懷伴人閒笑閒吟小桃未靜劉郎老把
相思細寫瑤琴怕歸來紅紫欺風三徑成陰

蝶戀花

丁丑七夕

誰送涼蟾消夜暑
河漢迢迢牛女何曾渡
乞得巧來無用處
世間枉費閒針縷
人在江南煙水路
頭白鴛鴦不道分飛苦
信遠翻嗔烏鵲誤
屏山暗鎖平陽雨

江神子

弔方榆討

思君夢裏說邯鄲
未成歡已炊殘
斷送春歸風雨霎
時間空有生前醫國手
醫不到子孫寒
欲登詩境弔方干
倩誰看北邙山落落
晨星不見暮雲還
莫在人間尋

食客尋見後匹如閑

柳梢青

七夕

乾鵲收聲濕螢度影庭院秋香步月移陰梳雲約翠人
在回廊 醺醺宿酒殘粧待付與溫柔醉鄉卻扇藏嬌
牽衣索笑今夜差涼

又

戲簡高菊礪

瞥眼光陰章臺舊路楊柳春深尚憶風流殢人倚玉替
客揮金 高陽醉後分襟想妬雨嗔雲到今消息真時

笑啼難處方表人心

臨江仙

代閨怨

蕩紫飄紅芳信斷都無人問
穠纖吟鞭倚醉問涼蟾香
消金縷篆塵壓寶粧奩
夢峽朝雲飛不到一春離緒
厭厭却疑歸燕礙重簾
心期花底誤眉恨柳邊添

浣溪沙

丁亥錢元宵

簾幕收燈斷續紅
歌臺人散彩雲空
夜寒歸路噤魚龍
宿醉未消花市月
芳心已逐柳塘風
丁寧鴛燕莫匆

匆

清平樂

趙園避暑

柳陰庭院簾約風前燕著雨荷花紅半斂
消得盈盈綠扇竹光野色生寒玉
纖雪藕冰盤長記酒醒人靜暗香吹月闌干

賀新郎

題王守西湖書院

雲淡天垂野望晴郊疎煙半捲斷虹低跨
老樹連陰藏遠景十里湖光照夜看不盡
真山圖畫春滿軒窗無著

處更銀蟾冷浸鴛鴦瓦人共境轉幽雅 文章太守歸
來也似當年和靖風流小孤山下問訊佩蘭餐菊友曾
約梅兄入社待付與竹臞陶寫塵外閒尋行樂地任倚
人歌舞喧臺榭詩世界有王謝

江神子

三月晦日西湖餞春

送春曾到百花洲夕陽收暮雲畱想伴花神騎鶴上揚
州回首湖山情味淡重把酒更登樓 相思南浦古津
頭未拏舟已驚鷗柳外歸鴉點點是離愁空倚陽關三

疊曲歌不盡水東流

念奴嬌

茉莉

調冰弄雪想花神清夢徘徊南土一夏天香收不起付
與藥仙無語秀入精神涼生肌骨銷盡人間暑稼軒愁
絕惜花還勝兒女長記歌酒闌珊開時向晚笑浥金
莖露月浸闌干天似水誰伴秋娘窗戶困殢雲鬟醉歌
風帽總是牽情處返魂何在玉川風味如許

阮郎歸

秋夜

寒陰漠漠夜來霜
階庭風葉黃
歸鴉數點帶斜陽
誰家砧杵忙
燈弄幌
月侵廊
熏籠添寶香
小屏低枕怯更長
和雲入醉鄉

又
丹桂

金莖浥露未成霜
西風只舊涼
藥仙何事換霞粧
惱人秋思長
香世界
錦文章
花神不覆藏
小山騷客政清狂
同花入醉鄉

玉樓春

東山探梅

泠泠水向橋東去漠漠雲歸溪上住疎風淡月有來時
流水行雲無覓處佳人獨立相思苦薄袖欺寒修竹
莫白頭空負雪邊春著意問春春不語

行香子

贈柳兒行

露葉煙條天與多嬌算風流張緒難消惱人春思政自
無聊奈歛愁眉酣醉眼減圍腰風絮招要蝶弄鶯嘲
最關情是短長橋解驂分袂催上蘭橈更綠波平紅日
墜碧雲遙

施乘之

楓溪

清平樂

元夕

風消雲縷一碧無今古欲壞上元天不許晴了晚來些
雨莫言冷落山家山翁本厭繁華試問蓮燈千炬何
如月上梅花

戴式之

名復古號石屏天台詩人

滿江紅 赤壁懷古

赤壁磯頭一番過一番懷古想當時周郎年少氣吞區
宇萬騎臨江貔虎噪千艘烈炬魚龍怒卷長波一鼓困
曹瞞今如許江上渡江邊路形勝地興亡處覽遺蹤
勝讀史書言語幾度東風吹世換千年往事隨潮去問
道旁楊柳為誰春搖金縷

沁園春 自述

一曲狂歌有百餘言說盡平生費十年燈火讀書讀史

四方奔走求利求名蹭蹬歸來閉門獨坐贏得窮吟詩
句清夫詩者皆吾儂平日愁歎之聲空餘豪氣崢嶸
安得良田二頃耕向臨邛滌器可憐司馬成都賣卜誰
識君平分則宜然吾何敢怨螻蟻逍遙戴粒行開懷抱
有青梅薦酒綠樹啼鶯

賀新郎 豐真州建江淮偉觀樓

百尺連雲起試登臨江山人物一時俱偉秀挹金陵龍
虎勢京峴諸峰對峙隱隱接揚州歌吹雪浪舞從三峽

下乍逢迎海若談秋水形勝地有如此使君一世經
綸志把風斤月斧來此等閒遊戲見說樓成無多日大
手一何容易笑天下紛紛血指醞釀春風與和氣舉長
江變作香醪美人共樂醉桃李

又寄豐宅之

憶把金壘酒歎別來光陰荏苒江湖宿留世事不堪頻
著眼贏得兩眉長皺但東望故人翹首木落山空天遠
大送飛鴻北去傷懷久天下事公知否錢塘風月西

湖柳渡江來百年機會從前未有喚起東山邱壑夢莫
惜風霜老手要整頓封疆如舊早晚樞庭開幕府是英
雄盡為公奔走看金印大如斗

又

兄弟爭塗田而訟歌此詞主和議

蝸角爭多少是英雄割據乾坤到頭休了一片泥塗荒
草地盡是魚龍故道新堤上風濤難保滄海桑田何時
變怕桑田未變人先老休為此生煩惱 訟庭不許頻
頻到這官坊翻來覆去有何分曉無諍人中為第一長

訟元非吉兆但有恨平章不早樽酒喚回和氣在看從
來兄弟依然好把前事付一笑

木蘭花慢

懷舊

鶯啼啼不盡憑燕語語難通這一點芳心十年不斷惱
亂東風重來故人何處但依前流水小橋東記得同題
粉壁而今壁破無蹤 蘭皋空漲綠溶溶流恨落花紅
念著破春衫當時送別燈下裁縫相思謾令自苦嘆雲
煙過眼總成空落日楚天無際凭欄目送歸鴻

水調歌頭

題李季允侍郎鄂州吞雲樓

輪奐半天上，勝槩壓南樓。籌邊獨坐，豈欲登覽快雙眸。
浪說胸吞雲夢，直把氣吞強敵，西北望神州。百載好機
會，人事恨悠悠。騎黃鶴，賦鸚鵡，謾風流。岳王祠畔，楊
柳烟鎖古今愁。整頓乾坤手段，指授英雄方畧，雅志若
為酬。杯酒不在手，雙鬢恐驚秋。

滿庭芳

楚州上巳萬柳池應監丞飲客

三月春光，羣賢勝餞，山陰何似山陽。鵝池墨妙，曲水記

流觴自許風流邱壑何人共擊楫長江新亭上山河有
異舉目恨堂堂使君經世志十年邊上兩鬢風霜問
池邊楊柳因甚淒涼萬樹重新種了株株在桃李花傍
仍須待賸栽蘭芷為國洗河湟

又

元夕上郡武王守子文

草木生春樓臺不夜團團月上雲霄太平官府民物共
逍遙指點江梅一笑幾番負雨秀風嬌今年好花邊把
酒歌舞醉元宵風流賢太守青雲志氣玉樹丰標是

神仙班裏舊日王喬出奉版輿行樂金蓮照十里笙簫
收燈後看看丹詔催入聖明朝

清平樂

興國軍呈李司直

今朝欲去忽有留人處說與江頭楊柳樹繫我扁舟且
住十分酒興詩腸難禁冷落秋光借取春風一笑狂
夫到老猶狂

盧申之

名祖臯號蒲江樓攻媿先生之甥趙紫芝翁

靈舒諸賢之詩友樂章甚工字字可入律呂

浙人皆唱之有浦江詞稿行於世

賀新郎

彭傳帥
益擅漁

於吳江三高堂之前作釣雪亭
人之虛宅以供詩境也趙子野

約余
賦之

挽住風前柳問鷗夷當日扁舟近曾來否月落潮生無
限事零亂茶煙未久謾留得蓴鱸依舊可是功名從來
誤撫荒祠誰繼風流後今古恨一搔首江涵鴈影梅
花瘦四無塵雪飛雲凍夜窗如畫萬里乾坤清絕處付

金瓶梅詞話卷八
與漁翁釣叟又恰是題詩時候猛拍闌干呼鷗鷺道他
年我亦垂綸手飛過我共樽酒

又 姑蘇臺觀雪

十頃涵空碧畫圖中崢嶸幻玉亂零吹壁倚徧危欄吟
不盡把酒風前岸幘記當日西湖為客誰剪吳松江上
水笑乾坤奇事成兒劇還照我夜窗白 崇臺目斷清
無極引枝筇瓊瑤步軟印登臨屐娃館娉婷知何在淚
粉愁儂恨積故作飛花狼籍舊事悠悠渾莫問有玉

蟾醉裏曾相識聊伴我夜吹笛

宴清都

初春

春訊飛瓊管風日薄度墻啼鳥聲亂江城次第笙歌翠
合綺羅香煖溶溶澗綠冰泮醉夢裏年華暗換料黛眉
重鎖隋堤芳心還動梁苑新來鴈閣雲音驚分鑑影
無計重見啼春細雨籠愁澹月凭時庭院離腸未語先
斷算猶有憑高望眼更那堪芳草連天飛梅弄晚

魚遊春水

離愁

離愁禁不去好夢別來無覓處風翻征袂觸目年芳如
許軟紅塵裏鳴鞭銍拾翠叢中勾伴侶都負歲時暗關
情緒昨夜山陰杜宇似把歸期驚倦旅遙知樓倚東
風凝顰暗數寶香拂拂遺鴛錦心事悠悠尋燕語芳草
暮寒亂花微雨

倦尋芳

春思

香泥壘燕密葉巢鶯春晴寒淺花徑風柔著地舞裊紅
軟鬪草煙欺羅袂薄秋千影落春遊倦醉歸來記寶帳

歌慵錦屏香煖 別來悵光陰容易還又荼蘼牡丹開
徧妬恨疎狂那更柳花迎面鴻羽難憑芳信短長安猶
近歸期遠倚危樓但鎮日綉簾高捲

西江月

中春

燕掠晴絲裊裊魚吹水葉粼粼禁街微雨灑芳塵寒食
清明相近 謾著宮羅試煖閒呼社酒酬春晚風簾幕
悄無人二十四番花訊

清平樂

春恨

柳邊深院燕語明如剪消息無憑聽又懶隔斷畫屏雙
扇 寶杯金縷紅牙醉魂幾度兒家何處一春游蕩夢
中猶恨楊花

烏夜啼

離恨

柳色津頭泣綠桃花渡口啼紅一春又負西湖醉離恨
雨聲中 客袂迢迢西塞餘寒剪剪東風誰家拂水飛
來燕惆悵小樓空

又

西湖

漾暖紋波颭颭吹晴絲雨濛濛輕衫短帽西湖路花氣
撲春驄鬪草寒衣濕翠秋千瞥眼飛紅日長不放春
醪困立盡海棠風

又 秋別

段段寒沙淺水蕭蕭暮雨孤篷香羅不共征衫遠砧杵
客愁中別恨慵看楊柳歸期暗數芙蓉碧梧聲到紗
窗曉昨夜幾秋風

謁金門

惜別

蘭棹舉相趨落紅飛去一隙輕簾凝睇處柳絲牽不住
昨日翠蛾金縷今夜碧波煙渚好夢無憑窗又雨天
涯知幾許

又
春思

閒院宇獨自行來行去花片無聲簾外雨峭寒生碧樹
做弄清明時序料理春醒情緒憶得歸時停棹處畫
橋看落絮

水龍吟

茶蘼

蕩紅流水無聲暮煙細草粘天遠低回倦蝶往來忙燕
芳期頓懶綠霧迷牆翠虬騰架雪明香煖笑依依欲挽
春風教住還疑是相逢晚不似海粧瘦減占人間丰
神蕭散攀條弄藥天涯猶記曲闌小院老去情懷酒邊
風味有時重見對枕幃空想東窗舊夢帶將離恨

又 淮西重午

會昌湖上扁舟幾年不醉西山路流光又是宮衣初試
安榴半吐千里江山滿川煙草薰風淮楚念離騷恨遠

獨醒人去闌干外誰懷古 亦有魚龍戲舞豔晴川綺
羅歌鼓鄉情節意樽前同是天涯羈旅漲綠池塘翠陰
庭院歸期無據問明年此夜一眉新月照人何處

洞仙歌

茉莉

玉肌翠袖較似醺醺瘦幾度熏醒夜窗酒問炎州何事
得許清涼塵不到一段冰壺剪就 晚來庭戶悄暗數
流光細拾芳英黯回首念日暮江東偏為魂銷人易老
幽韻清標似舊政簾紋如水帳如煙更奈向月明露濃

時候

鷓鴣天

春懷

纖指輕拈小砑紅
自調宮羽按歌童
寒餘芍藥欄邊雨
香落茶蘼架底風
閒意態小房櫳
丁寧須滿玉西東
一春醉得鶯花老
不似年時怨玉容

又
春暮

庭綠初圓結蔭濃
香溝收拾樹梢紅
池塘少歇鳴蛙雨
簾幕輕迴舞燕風
春又老
笑誰同
澹煙斜日小樓東

相思一曲臨風笛吹過雲山第幾重

摸魚兒

九日登姑蘇臺

怪西風曉來欹帽年華還是重九天機袞袞山新瘦客
子情懷誰剖微雨後更鴈帶邊寒裊裊欺羅袖慵荷倦
柳誚不似黃花田田照眼風味儘如舊登臨地寂寞
崇臺最久闌干幾度搔首翻雲覆雨無窮事流水斜陽
知否吟未就但衰草寒煙畧愁時候閑愁浪有總輸
與淵明東籬醉舞身世付杯酒

夜飛鵲慢

別意

驕嘶破清曉分恨臨期花下恁月明知餘光是處散離
思最憐香靄霏霏牽衣搵彈淚問淒風愁露剗地東西
留鞭換佩怕匆匆已是遲遲涼怯幾番羅袂還燕別
文梁螢點書幃一自秋娘迢遞黃金對酒爭忍輕揮新
來院落鴈難尋簾幕長垂怕彫梧敲徑驚回舊夢應也
顰眉

漁家傲

壽白石

白石山中風景異先生日日懷歸計何事黃岡飛雪地
偏著意畫堂却為東坡起人說前身坡老是文章氣

節渾相似只待鼎彞勲業遂梅花外歸來長向山中醉

木蘭花慢

別西河兩詩僧

嫩寒催客棹載酒去載詩歸政紅葉漫山清泉漱石多
少心期三生溪橋話別悵薜蘿猶惹翠雲衣不似今番
醉夢帝城幾渡斜暉鴻飛煙水瀾瀾回首處只君知
念吳江鷺憶孤山鶴怨依舊東西高峯夢醒雲起是瘦

吟窗底憶君時何日還尋後約為余先寄梅枝

沁園春

雙溪狎鷗

幾葉凋楓半篙寒日倚橋繫船愛洞門深鎖人間福地
雙溪分占天上星躔破帽欹寒短鞭敲月此地經行知
幾年空贏得似沈郎銷瘦還欠詩篇沙鷗伴我愁眠
向水驛風亭紅蓼邊有村醪可飲且須同醉溪魚堪鱸
切莫論錢笠澤波頭垂虹亭上橙蟹肥時霜滿天相隨
否算江南江北惟有君間

菩薩蠻

春思

翠樓十二闌干曲雨痕新染蒲萄綠時節又黃昏東風
深閉門玉簫吹未徹窗影梅花月無語只低眉間拈
雙荔枝

滿江紅

齊雲月酌

樓倚晴空炎雲淨晚來風力滄海外等閒吹上滿輪寒
壁河漢低垂天欲近乾坤浩蕩秋無極凭欄干衣袂拂
青冥知何夕登眺地追疇昔吳越事皆陳迹對清光

祇有醉吟消得萬古悠悠惟月在浮生
袞袞空頭白自騎鯨仙去有誰知遙相憶

李公甫

名劉號梅亭

賀新郎

上趙侍郎生日

鵲立通明殿又重逢揆余初度夢庚華旦不學花奴簪
紅槿且看秋香宜晚在甲子從新更換天欲東都修車
馬故降神生甫維周翰歌崧嶽詠江漢明堂朝罷夷

琛獻引星辰萬人共聽風塵長算清畫山東諸將捷席
捲黃河兩岸問誰在玉皇香案師保萬民功業別向西
京原廟行圭瓚定邦鄩卜瀍澗

花菴詞選續集卷八

欽定四庫全書

花菴詞選續集卷九

宋 黃昇 撰

宋詞

張宗瑞

名輯鄱陽人自號東澤有詞二卷名東澤綺
語債朱湛盧為序稱其得詩法於姜堯章世
所傳款乃集皆以為采石月下謫仙復作不
知其又能詞也其詞皆以篇末之語而立新

名云

疎簾淡月

寓桂枝香

秋思

梧桐雨細漸滴作

去聲

秋聲被風驚碎潤逼衣篝線裏蕙

鑪沈水悠悠歲月天涯醉一分秋一分憔悴紫簫吹斷

素牋恨切夜寒鴻起

又何苦淒涼客裏負草堂春綠

竹溪空翠落葉西風吹老幾番塵世從前諳盡江湖味

聽商歌歸興千里露侵宿酒疎簾淡月照人無寐

貂裘換酒

寓賀新郎

乙未冬別馮可久

笛喚春風起向湖邊臘前折柳問君何意孤負梅花立
晴晝一舸淒涼雪底但小閣琴棋而已佳客清朝留不
住為康廬只在家窗裏湓浦去兩程耳 草堂舊日談
經地更從容南山北水庾樓重倚萬卷心胃幾今古牛
斗多年紫氣正江上風寒如此且趁霜天鱸魚好把貂
裘換酒長安市明夜去月千里

淮甸春

寓念奴嬌

丙申歲游高沙訪淮海迹

短髯懷古更文遊臺上秋生吟興聞說坡仙來把酒月

底頻留清影極目平蕪孤城泗水畫角西風勁曲欄猶
在十分心事誰領詞卷空落人間黃樓何處回首愁
深省斜照寒鴉知幾度夢想當年名勝只有山川曾窺
翰墨彷彿餘風韻舊遊休問柳花淮甸春冷

如此江山

寓齊天樂

西風揚子江頭路扁舟雨晴呼渡岸隔瓜洲津橫蒜石
搖盡波聲千古詩仙一去但對峙金焦斷磯青樹欲下
斜陽長淮渺渺正愁予中流笑與客語把貂裘為浣

半生塵土品水烹茶看碑憶鶴恍似舊曾遊處聊憑陸
誥問八極神遊肯重來否如此江山更蒼煙白鷺

釣船笛

寓好事近

載酒岳陽樓秋入洞庭深碧極目水天無際正白蘋風
急月明不見宿鷗驚醉把玉欄拍誰解百年心事恰
釣船橫笛

廣寒秋

寓鷓鴣橋仙

杯行將半月來猶未瀟灑水亭無暑清宵數客一欄秋

對冰雪荷花似語 雄邊臺上文遊臺上咫尺紅雲容
與天風吹送廣寒秋正畫舸湖光佳處

月當窗

寓霜天曉角

看朱成碧曾醉梅花側相遇匆匆相別又爭似不相識
南北千里隔幾時重見得最苦子規啼處一片月當
窗白

山漸青

寓長相思

山無情水無情楊柳飛花春雨晴征衫長短亭擬行

行重行行吟到江南第幾程
江南山漸青

碧雲深

寓憶秦娥

風淒淒井欄絡緯驚秋啼
驚秋啼涼侵好夢月正樓西
卷簾望月知心誰關河空
隔長相思長相思碧雲暮
合有美人兮

東仙

寓沁園春

馮可遷號予為東仙故賦

東澤先生誰說能詩興到
偶然但平生心事落花啼鳥
多年盟好白石清泉家近
宮亭眼中廬阜九疊屏開雲

錦邊出門去且掀髯大笑有釣魚船 一絲風裏嬋娟
愛月在滄浪上下天更叢書觀遍筆牀靜書蓬窗睡起
茶竈疎煙黃鶴來遲丹砂成未何日風流葛稚川人間
世聽江湖詩友號我東仙

南浦月

寓點絳唇

賦瀟湘漁父

來剪尊絲江頭一陣鳴蓑雨孤蓬歸路吹得蘋風暮
短髮蕭蕭笑與沙鷗語休歸去玉龍嘶處邀月過南浦

沙頭雨

寓點絳唇

帶醉歸時月華猶在吹簫處曉愁情緒忘却匆匆語

客裏風霜詩鬢空如許江南去岸花迎艣遙隔沙頭雨

花自落

寓謁金門

春寂寞簾底蕙爐煙薄聽盡歸鴻書怎託相思天一角

象筆鸞牋間却秀句與誰商畧睡起愁懷何處著無

風花自落

垂楊碧

寓謁金門

花半濕睡起一窗晴色千里江南真咫尺醉中歸夢直

前度蘭舟送客雙鯉沉沉消息樓外垂楊如此碧問
春來幾日

欄干萬里心

寓憶王孫

小樓柳色未春深湘月牽情入苦吟翠袖風前冷不禁
怕登臨幾曲闌干萬里心

杏梁燕

寓解連環

小樓春淺記鈎簾看雪袖粘芳片似不似柳絮因風更
細與品題屢呵冰硯宛轉吟情縱真草鳳牋都徧到燈

前笑謔酒被峭寒移盡更箭而今柳陰滿院却花空
雪似人隔春遠歎萬事流水斜陽謾贏得前詩醉汗團
扇脉脉重來算唯有畫欄曾見把千種舊愁付與杏梁
語燕

比梅

寓如夢令

深夜沉沉尊酒酒醒客衾寒透城角挾霜飛吹得月如
清晝倏倏倏倏比著梅花誰瘦

月上瓜洲

寓相見懽 南徐多景樓作

江頭又見新秋幾多愁塞草連天何處是神州 英雄
恨古今淚水東流唯有漁竿明月上瓜洲

月底修簫譜

寓祝英臺近 乙未之秋高郵朱
史君錢塘北關舟中

客西湖聽夜雨更向別離處小小船窗香雪照尊俎斷
腸一曲秋風行雲不語總寫入征鴻無數 認眉嫵喚
醒巖壑風流丹砂有奇趣羞殺秦郎淮海謾千古要看
自作新詞雙鷺飛舞趁月底重修簫譜

一絲風

寓訴衷情

泊松江作

卧虹千尺界湖光，冷浸月茫茫。當日三高何處，漁唱入
淒涼。人世事，縱軒裳，夢黃梁。有誰蓑笠，一釣絲風，吹
盡荷香。

憶蘿月

寓清平樂作

客盱江秋夜鼓琴思故山

新涼窗戶間，對琴言語彈到無人知得處。兩袖五湖煙
雨，坐中斗轉參橫，珠躔碎落，瑤觥憶著故山蘿月。今
宵應為誰明。

宋謙父

名自遜號壺山南昌人文筆高絕當代名流
皆敬愛之其詞集名漁樵笛譜

驀山溪

自述

壺山居山未老心先懶愛學道家辨竹几蒲團茗椀
青山可買小結屋三間開一逕俯清溪修竹栽教滿
客來便請隨分家常飯若肯小留連更薄酒三杯兩琰
吟詩度曲風月任招呼身外事不關心自有天公管

沁園春

送戴石屏

歸去來兮田園將蕪云胡不歸既有詩千首如斯者少
行年七十從古來稀地缺東南天傾西北人事何緣有
足時江湖上轉不如前日步步危機石屏自有柴扉
占海岸潮頭伴一磯喚綵衣孫子攜壺挈榼白頭翁媼
舉按齊眉身外聲名世間夢幻萬事一醒無是非書來
往都不須長語直寫心期

賀新郎

題雪堂

喚起東坡老問雪堂幾番興廢斜陽衰草一月有錢三

十塊何苦抽身不早又底用北門摘藻儋耳蠻煙添老
色和陶詩翻被淵明惱到底是忘言好 周郎英發人
間少謾依然烏鵲南飛山高月小歲月堂堂畱不住此
世何時是了算不滿英雄一笑我有豐淮千斗酒把新
愁舊恨都傾倒三弄笛楚天曉

又
七夕

靈鵲橋初就記迢迢重湖風浪去年時候歲月不畱人
易老萬事茫茫宇宙但獨對西風搔首巧拙豈關今夕

事奈癡兒騃女流傳謬添話柄柳州柳道人識破灰心久只好風涼月佳時疎狂如舊休笑雙星經歲別人到中年已後雲雨夢可曾常有雪藕調冰花薰茗正梧桐雨過新涼透且隨分一杯酒

滿江紅

秋感

舉扇西風又十載重遊秋浦對舊日江山錯愕鬢絲如許世事興亡空感慨男兒事業誰堪數被老天開眼看人忙成今古江上路喧聲鼓山中地紛豺虎謾乾坤

許大著身何處名利等成狂夢寐文章亦是閒言語
雙投酒熟蟹螯肥忘羈旅

西江月

自述

何敢笑人干祿自知無分彈冠只將貧賤博清閒
留取書遮老眼世上風波任險門前路徑須寬心無忘想
夢魂安萬事鶴長鳬短

王子文

名埜號潛齋

西河

天下事問天怎忍如此陵圖誰把獻君王結愁未已少
豪氣緊總成塵空餘白骨黃葦千古恨吾老矣東遊
曾弔淮水綉春臺上一迴登一迴搵淚醉歸撫劒倚西
風江濤猶壯人意只今袖手野色裏望長淮猶二千
里縱有英心誰寄近新來又報兵塵起絕域張騫歸來
未

曹西士

名幽號東畎

西河 和王潛齋韻

今日事何人弄得如此漫漫白骨蔽川原恨何日已關
河萬里寂無煙月明空照廬葦謾哀痛無及矣無情
莫問江水西風落日慘新亭幾人墮淚戰和何者是良
籌扶危但看天意只今寂寞藪澤裏豈無人高卧問
里試問安危誰寄定相將有詔催公起須信前書言猶
未

李俊明

名昂英號丈溪

摸魚兒

送王子文知太平州

怪朝來片紅初瘦半分春事風雨丹山碧水含離恨有
脚艷陽難駐芳草渡似叫住東君滿樹黃鸝語無端杜
宇報采石磯頭驚濤屋大寒色要春護陽關唱畫鷁
徘徊東渚相逢知又何處摩挲老劒雄心在對酒細評
今古君此去幾萬里東南隻手擎天柱長生壽母更穩

坐安輿三槐堂上好看綵衣舞

趙用父

名以夫號虛齋

賀新郎

餞鄭金部去國

載酒陽關去正西湖連天煙草滿堤晴絮采翠擷芳遊
冶處應和嬌絃艷鼓看柳外畫船無數萬頃琉璃渾鏡
淨隄風波洶洶魚龍舞談笑裏遽如許流觴滿引澆
離緒便東西斜陽立馬綠波南浦自是尊鱸高興動恰

聽春山杜宇謾回首軟紅香霧咫尺佳人千里隔望空
江明月橫洲渚清夢斷恨如縷

黃子魯

名師參號魯菴三山人白石先生之子

沁園春

錢金部去國

谷口高人偶泝明河近尺五天見紫霄宮闕空中突兀
玉皇姬侍雲裏蹁躑滴露研朱披肝作紙細寫靈均孤
憤篇排雲叫奈大鈞不管沙界三千語高天上驚傳

早斥去人間伴謫仙念赤城丹籍香名空在蓬萊弱水
欲到無緣還倚枯槎飄然歸去回首清都若箇邊家山
好有一灣風月小小漁船

潘庭堅

名物號紫巖乙未探花以氣節聞於時

南鄉子

題南劍州妓館

生怕倚闌干閣下溪聲閣外山惟有舊時山共水依然
暮雨朝雲去不還應是躡飛鸞月下時時整佩環月

又漸底霜又下更闌折得梅花獨自看

吳毅甫

名潛號履齋嘉定丁丑狀元有履齋詩餘行
於世

滿江紅

送李御帶珙

紅玉階前問何事翩然引去湖海上一汀鷗鷺半帆煙
雨報國無門空自怨濟時有策從誰吐過垂虹亭下繫
扁舟鱸堪煮拚一醉留君住歌一曲送君路徧江南

江北欲歸何處事悠悠渾未了年光冉冉今如許試
舉頭一笑問青天天無語

又 齊山綉春臺

十二年前曾上到綉春臺頂雙脚健不煩筇杖透巖穿
嶺老去漸消狂氣習重來依舊佳風景想牧之千載尚
神遊空山冷 山之下江流水江之外淮山暝望中原
何處虎狼猶梗勾蠡規模非淺近石符事業真俄頃問
古今宇宙竟如何無人省

又金陵烏衣園

柳帶榆錢又還過清明寒食天一笑滿園羅綺滿城簫
笛花樹得晴紅欲染遠山過雨青如滴問江南池館有
誰來江南客烏衣巷今猶昔烏衣事今難覓但年年
燕子晚煙斜日抖擻一春塵土債悲涼萬古英雄迹且
芳樽隨分趁芳時休虛擲

水調歌頭

送吳叔永文昌

才惜季方去又更別元方驚心天上雙鳳接翅下高岡

萬里瞿塘煙浪一片昭亭雲月渺渺正相望夜雨連風
壑此意獨淒涼杜鵑聲猶不住攪離腸黃雞白酒吾
亦歸興動家鄉人事紛紛難料世事悠悠難說何處問
穹蒼肯落兒曹淚一笑付滄浪

賀新郎

送吳叔李侍郎

說著成淒楚正塵飛岷峨灩澦兔皐狐舞頗牧禁中留
不住彈壓征西幕府便一舸月汀煙渚四塞三關天樣
險問何人自闢鼪鼪路成敗事幾今古茶蘼芍藥春

將暮最無情飄零柳絮攪人離緒屈指秋風吹鴈訊應
憶西湖夜雨謾歲月消磨如許上下四方男子志肯臨
岐昵昵兒曹語呼大白為君舉

又

吳中韓氏滄浪亭和吳夢窗韻

撲盡征衫氣小夷猶樽壘杖屨踏開花事解后山翁行
樂處何似烏衣舊里歎荒草舞臺歌地百歲光陰如夢
斷算古今興廢都如此何用灑兒曹淚江南自有漁
樵隊想家山猿愁鶴怨問人歸未寄語寒梅休放盡留

取三花兩藥待老子領些春意皎皎風流心自許儘何妨瘦影橫斜水煩翠羽伴醒醉

又

用趙用父左司韻送鄭宗丞

又是春殘去倚東風寒雲淡日墮紅飄絮燕社鴻秋人不問儘管吳笙越鼓但短髮星星無數萬事惟消彭澤醉也何妨袖卷長沙舞身與世只如許闌干拍手間情緒便明朝蒼煙白鷺北山南渚笑指午橋橋畔路簾幕深深院宇尚起得柳煙花霧我亦故山猿鶴怨問何

時歸棹雙谿渚歌一曲恨千縷

又寄越南仲

煙樹瓜洲岸望旌旗獵獵遙空故人天遠不似沙鷗飛
得渡直到雕鞍側畔但徙倚危闌目斷自古鍾情須我
輩況人間萬事思量遍濤似雪風如箭揚州十里珠
簾捲想桃根桃葉依稀舊家庭院誰把青紅吹到眼知
有醉翁局段便回首舟移帆轉渺渺江波愁未了正淮
山日暮雲撩亂閣酒盞倚歌扇

又 春感

笑口開能幾把年年芳情冶思總拋閒裏桃杏枝頭春
才半寒食清明又是但歲月飈飛川逝回首秦樓雙燕
語到如今目斷斜陽外將往事試重記 香羅尚有相
思淚笑人生新愁易積舊歡難繼水上流紅無覓處還
隔關山萬里但贏得新來憔悴昨夜東風顛狂後想餘
芳盡是飄零底詞寫就倩誰寄

滿庭芳

春感

漠漠春陰疎疎春雨鶉鳩喚起春眠小園人靜獨自倚
鞦韆又見飄紅墮雪芳徑裏都是花鈿年年事間愁間
悶挂在綠楊邊尋思都徧了功名竹帛富貴貂蟬但
身為利鎖心被名牽爭似依山傍水數椽外二頃良田
無縈絆炊粳釀秫長是好花天

酹江月

梅花

曉來窗外正南枝初放兩花三葉千古春風頭上立羞
退穠桃繁李姑射神遊壽陽粧褪色界塵都洗竹扉松

戶平生所寄聊耳 堪笑強說和羹此君心事指高山
流水隴驛淒涼却怕被哀角城頭吹起此處關情為他
凝佇淡月清霜裏巡簷何事歲寒相誓而已

又

暇日登新樓望揚州於雲煙縹緲之間寄趙南仲端明

半空樓閣把江山圖畫一時收拾白鳥孤飛飛盡處最
好暮天秋碧萬里西風百年人事謾倚闌干拍凝眸何
許揚州煙樹歷歷 應念老子年來浮名浮利已作虛
空擲三徑才尋歸活計又是飄零為客回首平生驚心

雙鬢容易成悽惻尊前一笑且由醉帽歌側

聲聲慢

和吳夢窗賦梅

挨晴抄暖載酒呼朋夷猶東圃西園綠萼枝頭兩三初
破輕寒平生自甘寂寞占冷妝不為人妍林逋去問影
疎香暗誰賦其間空想故山奇事正煙橫嶺曲月浸
溪灣杏錯桃訛那時青子都圓惟饒夢窗知處對翠禽
依約神仙休引角怕征人淚落塞邊

王實之

名邁號臞軒莆陽人丁丑第四人及第

賀新郎

呈劉後村時自桂林被召到莆又遭煩言

出了羅浮洞有多情梅花雪片殷勤相送見說脩然琴
鶴外詩壓牛腰較重又管甚羣兒嘲弄嶺海三年持翠
節料無時不作家山夢馳玉勒歸金鳳

金鳳池乃所居也

一

門朱紫環昆仲看堦庭森森蘭玉慈顏歡動宰相時來
須著做且舞萊衣侍奉却不信大才難用時事多艱人
物少便中興誰辨浯溪頌更大廈要梁棟

又為後村母夫人壽

瓔珞珠垂縷看花冠端容麗服補陀巖主只坐塵緣蹉
一念朱紫叢中得度人世福夫人兼五銀鹿諸孫來定
省對金屏綉幕輝雲母人頂禮柳行路

所居地名柳行

朝朝

口誦琅函句覺從來壽仁福善老天無誤消得天恩封

福國錦誥鸞翔鳳舞聽來歲日邊佳語上殿肩輿簾感

綉遣佳兒扶掖天應許笑陳媼三題柱

有陳夫人者題閨帥廳柱云嘗

侍父從夫及就養三至此解

又送趙伯泳侍郎守溫陵

憶昔同時召正青山親提玉尺量材廊廟當日班行比
元祐北玉西珠照耀一轉首宮商移調君自烏臺登騎
省覺精神風采增清峭數賢者一不肖酒酣耳熱惟
長嘯便翩翩輟班荷橐一麾閩嶠堪笑狂生無用處垂
老雲耕月釣這富貴非由人要疇昔評君如玉雪好脩
然琴鶴風塵表清獻後又有趙

又丁未守邵武宴同官

此是河清宴覺朝來薰風滿入生綃團扇太守愁眉才
一展且喜街頭米賤也莫管官租難辦遶砌苔錢無限
數更蓮池雨過珠零亂儘買得凌波面家山樂事真
堪羨記年時荔支新熟荷筒齊勸底事來尋蕉鹿夢羸
得乾忙似箭笑富貴都如郵傳做了豐年還百姓便尊
鱸歸興催張翰看卿等上霄漢

摸魚兒

閩漕王幼學作碧灣丹嶂堂歌此詞以
墨本見寄依韻和之

昔元城一生清峭南都高卧堅壁留耕便是元城樣何

肯枉吾尋尺曾直筆說社稷安危屢叩龍墀額明時遂
客却惠顧丹山來持翠節對此一灣碧澄清暇無奈
登臨有癖梅山時訪仙迹神仙偏喜公心事一見莞然
前席閑不得有先見著龜消得君王憶天閭不隅要濟
險孤舟支傾一柱公外向誰覓

沁園春

迎方石史德潤

首尾四年臺省好官都做一回便前頭更有合當做底
何妨且恁猛省歸來甲第新成開尊行樂脆管繁絃十

二釵回頭笑這狂生無用削盡官階 狂生真箇狂哉
潑性氣年來全未灰有龍鱗鳳翼不能攀附牛衣漁具
早已安排爛煮園蔬熟煨山芋白髮蒼顏窮秀才官休
做莫狂無處著送去瓊崖

念奴嬌

熙春臺宴同官

層臺雲外閱古今多少興衰成敗老木千章若箇是南
國甘棠遺愛羣籟號風繁陰蔽日有此清涼界賓朋在
坐朗然心目明快 更向會景亭前登高弔古此景何

人會歲歲春來春又去獨有靈臺春在早稻炊香晚禾
搖穗管取三登泰釀成春酒把杯行樂須再

方千里

三衢人盡和美成詩

過秦樓

春思

柳灑鵝黃草揉螺黛院落雨痕才斷蜂鬚霧濕燕觜泥
融陌上細風頻扇多少艷景關心長苦春光疾如飛箭
對東風忍負西園清賞翠深香遠空暗憶醉走銅駝

閒敲金轡倦跡素衣塵染因花瘦覺為酒情鍾綠鬢幾
番催變何況逢迎向人眉黛供愁嬌波回倩料相思此
際濃似飛紅萬點

風流子

憶別

河梁攜手別臨歧語共約踏青歸自雙燕再來斷無音
信海棠開了還又參差料此際笑隨花便回醉騁錦障
泥不憶故園粉愁香怨忍教華屋綠慘紅悲 萬家歌
舞地生疎久塵暗鳳縷羅衣何限可憐心事難訴歡期

但兩點愁蛾才開重斂幾行清淚欲制還垂爭表為郎
憔悴相見方知

訴衷情

旅思

一鈎新月淡於霜楊柳漸分行征塵厭堆襟袂雞唱促
晨裝淮水濶楚山長暗悲傷重陽天氣盃酒黃花還
寄他鄉

劉靜甫

名清夫居麻沙

念奴嬌

武夷詠梅

亂山深處見寒梅一朵皎然如雪的
顰妍姿羞半吐斜映小窗幽絕玉
染香腮酥凝冷艷容態天然別故人
雖遠對花誰肯輕折疑是姑射神
仙幔亭宴罷迤邐停瑤節愛此溪
山供秀潤飽翫洞天風月萬石叢
中百花頭上誰與爭潔麗桃俗李
不須連夜催發

沁園春

詠劉篁嶸碧蓮時內子將誕

淺碧芙蓉素艷亭亭前身阿嬌記
湘濱露冷酥容倍潔

華清水滑酒暈全消
瑤剪豐肌雲翻碎萼
白羽鮮明時
自搖風流處是古香
幽韻時度鮮飈
瓊枝壁月清標
對千朵嬋娟傾翠瓢
況水晶臺榭低迷淨
綠冰霜詞調
隱約輕橈細認金房
鍾奇孕秀已覺青衿
橫素腰西風
晚看花開十丈玉井
非遙

金菊對芙蓉

沙邑宰紹琴妓用舊韻戲之

淺拂春山慢橫秋水
玉纖閒理絲桐按清
冷繁露淡竚
悲風素絃瑤軫調新
韻顫翠翹金簇芙蓉
疊疊重鎖輕

挑慢摘特地情濃
泛商刻羽無窮似和鳴
鸞鳳律應
雌雄問高山流水此意誰同
箇中只許知音聽
有茂陵
車馬雍容
畫簾人靜
琴心三疊時倒金鍾

水調歌頭

殘臘捲愁去
春至莫閒愁
榮枯會有成說
無處著機謀
身世石中敲火
富貴草頭垂露
何用苦貪求
三尺布衣
劒千載赤松遊
憶親朋方外角
總白頭
羊腸世路
巖嶮莫莫且休休
選甚范侯高爵
遮莫陶公鉅產
爭似五

湖舟萬事付蝸角止坎謾乘流

玉樓春

柳梢綠小眉如印乍暖還寒猶未定惜花長是為花愁
殢酒却嫌添酒病 蠅頭蝸角都休競萬古豪華同一
盡東君曉夜促歸期三十六番花通信

花菴詞選續集卷九

欽定四庫全書

花菴詞選續集卷十

宋 黃昇 撰

宋詞

劉圻父

名子蒙號篁嶠翁居麻沙早登朱文公之門
劉後村嘗序其詩行於世

齊天樂

壽史滄洲

雅歌堂下新堤路柳外行人相語碧藕開花金桃結子

三見使君初度樓臺北渚似畫出西湖水雲深處綵鷁
雙飛水亭開宴近重午溪蒲堪薦綠醕慢亭何惜為
曾孫留住碧水吟哦滄洲夢想未放舟橫野渡維申及
甫正夾輔中興游天作柱願祝嵩高歲添長命縷

花發沁園春

呈史滄洲

換譜伊涼選歌燕趙一番樂事重起花新笑靨柳軟纖
腰濟楚衆芳園裏年年佳會長是倚清明天氣正魏紫
衣染天香蜀粧紅破春睡一簇猩羅鳳翠徧東園西

城點檢芳事鈴齋吏散書館人稀幾闌管絃清脆人生
適意流轉共風光遊戲到遇景取次成歡怎教良夜休
醉

玉樓春

題小竿嶺

今來古往吳京道歲歲榮枯原上草行人幾度到江濱
不覺身隨風樹老蒲花易晚蘆花早客裏光陰如過
鳥一般垂柳短長亭去路不如歸路好

沁園春

西巖三澗

雲壑泉泓小者如盃大者如罌更石筵平瑩寬容數客
淙流回激環遶飛觥三澗交流兩崖懸瀑擣雪飛霜落
翠屏經行處有丹萐碧草古木蒼藤 裊裊却倚山楹
笑山水娛人若有情見倚回側轉峰巒疊疊欲窮還有
巖谷層層仰視雲間茅茨雞犬疑有仙家來避秦青林
表望煙霞縹緲隱隱鸞笙

賀新郎

登玉田峰

拄杖凌高絕望千山隱隱波瀾動搖天末下有白雲平

遠壑湧起潮頭噴雪浸絕島孤峰出沒赤縣神州何處
是但風烟杳杳迷空闊呼不見古人物 碧松枝下青
瑤石舉頭看長空湛湛淡琉璃色上界星辰多官府夸
父忙鞭日月任兔走烏飛超忽宇宙茫茫如許大百年
間何用爭優劣身世事一毛髮

滿江紅

風泉峽觀泉

雲壑飛泉蒲根下懸流陸續堪愛處石池湛湛一方寒
玉暑際直當磐石坐渴來自引懸瓢掬聽泠泠清響瀉

淙琤勝絲竹 寒照膽消炎燠清徹骨無塵俗笑幽人
忻翫滯留空谷靜坐時看松鼠飲醉眠不礙山禽浴喚
仙人伴我酌瓊瑤餐秋菊

霜天曉角

春愁

橫陰漠漠似覺羅衣薄正是海棠時候紗窗外東風惡
惜春春寂寞尋花花冷落不會這些情味元不是念
離索

洞仙歌

寄劉令君潛夫

風饜雨足也解為花地收拾浮雲放新霽愛調亭小翠
點滴猩紅新粧了妃子朝來睡起遙知春有主整頓
歡娛興在新亭錦園底便選歌燕趙授簡鄒枚須記作
他日城山盛事笑東君不用管楊花任飛去天涯在東
風裏

吳君特

名文英自號夢窗四明人從吳履齋諸公遊
山陰尹煥叙其詞畧曰求詞於吾宋者前有

清真後有夢窗此非煥之言四海之公言也

聲聲慢

閨重九飲郭園

檀藥金碧婀娜蓬萊游雲不蘸芳洲露柳霜蓮十分點
綴殘秋新彎畫眉未穩似含羞低度墻頭愁送遠駐西
臺車馬共惜臨流知道池亭多宴掩庭花長是驚落
秦謳膩粉闌干猶聞凭袖香畱輸他翠漣拍甃瞰新粧
終日凝眸簾半捲帶黃花人在小樓

倦尋芳

餞周糾定夫

暮帆挂雨冰岸飛梅春思零亂送客將歸偏是故宮離
苑醉酒曾同涼月舞尋芳還隔紅塵面去難留悵夫容
路窄綠揚天遠便繫馬鶯邊清曉煙草晴花沙潤香
軟爛錦年華誰念故人遊倦寒食相思隄上路行雲應
在孤山畔寄新吟莫空回五湖春鴈

絳都春

為清華內子壽

香深霧暖正人在錦瑟年華深院舊日漢宮分得紅蘭
滋吳苑臨池羞落梅花片弄水月初勻粧面紫煙籠處

雙鸞共跨洞簫低按 歌筵紅圍翠袖凍雲外似覺東
風先轉繡幃晝遲花底天寬春無限仙郎驕馬瓊林宴
待捲上珠簾教看更傳鶯入新年寶釵夢燕

唐多令

惜別

何處合成愁離人心上秋縱芭蕉不雨也颼颼都道晚
涼天氣好有明月怕登樓 年事夢中休花空煙水流
燕辭歸客尚淹留垂柳不繫裙帶住謾長是繫行舟

法曲獻仙音

和丁宏菴韻

落葉霞翻敗窗風咽暮色淒涼深院瘦不關秋淚緣生
別情銷鬢霜千點悵翠冷搔頭燕那能語恩怨紫簫
遠記桃枝尚隨春渡愁未洗鉛水又將恨染粉縞澁離
箱忍重拈燈夜裁剪望極藍橋綵雲飛羅扇歌斷料鶯
籠玉鐸夢裏隔花時見

好事近

秋飲

鴈外雨絲絲將恨和愁都織玉骨西風添瘦減尊前歌
力袖香曾枕醉紅腮依約唾痕碧花下凌波入夢引

春雛雙鵝

憶舊遊

別黃澹翁

送人猶未苦苦送春隨人去天涯片紅都飛盡陰陰潤
綠暗裏啼鴉賦情頓雪雙鬢飛夢逐塵沙歎病渴淒涼
分香瘦減兩地看花 西湖斷橋路想繫馬垂楊依舊
歌斜葵麥迷煙處問離巢孤燕飛過誰家故人為寫深
怨空壁掃秋蛇但醉上吳臺殘陽草色歸思賒

宴清都

病渴文園久梨花月夢殘春故人舊愁彈枕雨哀翻帽
雪為情僂僂千金醉躍驕驄試問取朱橋翠柳痛恨不
買斷斜陽西湖醞入春酒 吳宮亂水斜煙留連倦客
慵更回首幽蛩韻苦哀鴻叫絕斷音難偶題紅汎葉零
亂想夜冷江楓暗瘦付與誰一半悲秋行雲在否

金縷曲

陪履齋先生滄浪看梅

喬木生雲氣訪中興英雄陳迹暗追前事戰艦東風慳
借便夢斷神州故里旋小築吳宮閒地華表月明歸夜

鶴歎當時花竹今如此枝上露濺清淚
遨頭小簇行春隊步蒼苔尋幽別塢看梅開未重唱梅邊新度曲催
發寒梢凍蘂此心與東君同意後不如今今非昔兩無
言相對滄浪水懷此恨寄殘醉

陳敬叟

名以莊號月溪建安人

水龍吟

記錢塘之恨

晚來江濶潮平越船吳檣催人去稽山滴翠胥濤濺恨

一襟離緒訪柳章臺問桃仙浦物華如故向秋娘渡口
秦娘橋畔依稀是相逢處窈窕青門紫曲舊羅新衣
翻金縷舊音恍記輕攏慢撚哀絃危柱金屋難成阿嬌
已遠不堪春暮聽一聲杜宇紅殷綠老雨花風絮

賀新郎

和劉潛夫韵

曉夢鶯呼起便安排詩家厨傳酒家行李點檢花邊新
雨露春在萬家生齒道官似錦溪清駛但使有人耕綠
野正不妨鼓吹頻來此方覓句且夷俟畫橋西畔多

春意記年年曾來幾度落花流水行到水窮雲起處依
約輞川竹里興未屬王孫公子料想明年端門裏有傳
柑宴罷黃封醉肯回首萬杉底

馮熙之

名取洽號雙溪翁延平人

摸魚兒

和玉林韵蓋為遺蛻山中桃花作

歎劉郎那回輕別霏霏三落紅雨玄都觀裏應遺恨一
抹淡煙殘縷愁望處想霧暗雲深忘却來時路新花舊

主記刻羽流商裁紅剪翠山徑日將暮
空枝上時有幽禽對語聲聲如問來否
人生行樂須聞健衰老念誰免此吾所
與在谿上深深錦綉千花塢何時定去
但對酒思君呼兒為我頻唱小桃句

賀新郎

送別江定軒

夢折營門柳送君歸暫戲斑衣又攏征袖
到得皇州風景異只有湖山似舊把感慨
寓之杯酒雨抹晴粧西子樣且平章剩賦
詩千首富與貴本來有青油幕底籌

攻守擁貔貅朝氣凌雲夜鋒衝斗蜀祲淮氛猶在眼一
掃政須健帚又何惜驅馳奔走快展韜鈴資世用看歸
來金印懸雙肘須玉笋為君壽

沁園春

中和節日為黃玉林壽

稟氣之中具聖之和生逢令辰算三春中月方纔破二
百年大齊去聲恰則平分立玉林深散花菴小中有脩然

自在身詩何似似蘇州閒遠庾府清新 青鞵布韉烏
巾試勇往蓉谿一問津有心香一瓣心聲一闕更携阿

艾同壽靈椿劫劫長存生生不息寧極深根秋又春聊

添我作

去聲

風流二老歲歲尋盟

西江月

太歲日作

老子齊頭六十新年第一今朝放開懷抱不須焦萬事
付之一笑煙柳效顰翠斂露桃獻笑紅妖已拚行樂
到元宵尚可追隨年少

蝶戀花

和玉林韵

秋到雙溪溪上樹葉葉涼聲未省來何許盡拓溪樓窗

與戶倚欄清夜窺河鼓 那得吟朋同此住獨對秋芳
欲寄花無處杖屨相從曾有語未來先自愁君去

馮偉壽

名父子號雲月雙溪子精於律呂詞多自製
腔

玉連環

憶李謫仙

謫仙往矣問當年飲中儔侶於今誰在歎沈香醉夢胡
塵日月流浪錦袍宮帶高吟三峽動舞劍九州隘玉皇

歸覲半空遺下詩囊酒佩 雲月仰挹清芬攬虬鬚尚
友千載晉宋顏波義黃春夢樽前一嘅待相將共躡龍
肩鯨背海山何處五雲靉靆

春風嫋娜

春恨

黃鍾羽

被梁間雙燕話盡春愁朝粉謝午花柔倚紅欄故與蝶
圍蜂遶柳綿無數飛上搔頭鳳管聲圓蠶房香煖笑挽
羅衫須少留隔院蘭馨趁風遠鄰牆桃影伴煙收 些
子風情未減眉頭眼尾萬千事欲說還休薔薇露牡丹

毵慙懃記省前度綢繆夢裏飛紅覺來無覓望中新綠
別後空稠相思難偶歎無情明月今年已是三度如鈎

春雲怨

上巳

黃鍾商

春風惡劣把數枝香錦和鶯吹折雨重柳腰嬌困燕子
欲扶扶不得軟日烘煙乾風收霧芍藥荼蘼弄顏色簾
幕輕陰圖書清潤日永篆香絕盈盈笑靨宮黃額試
紅鸞小扇丁香雙結團鳳眉心倩郎貼教洗金罍共看
西堂醉花新月曲水成空麗人何處往事暮雲萬葉

雲僊引

桂花

夾鍾羽

紫鳳臺高紅鸞鏡裏翻翻幾度秋聲黃金重綠雲輕丹
砂鬢邊滴栗翠葉玲瓏煙剪成含笑出簾月香滿袖天
霧縈身年時花下逢迎有遊女翩翩如五雲亂擲芳
英為簪斜朵事事關心長向金風一枝在手嗅藥悲歌
雙黛嚬遶臨溪樹對初弦月露下更深

眼兒媚

春情

自嚬雙黛聽啼鴉簾外翠煙斜社前風雨已歸燕子未

入人家 鞋兒試著無人看莫是忒寬些想他樓上悶
拈簫管憔悴鶯花

木蘭花慢

和答玉林韻

酒醒人世換碧桃靚海山春任青鳥沉沉紫鱗杳杳有
玉林人宮袍掉頭未愛愛荷衣不染市朝塵仙樣蓬萊
翰墨雲間驚鳳精神 笑呼銀漢入金鯨瓊苑自由身
羨咳唾成章香薰花霧音和韶均六丁夜來捧去使天
人也自歎尖新那得金牋飛灑浩歌飛步蒼旻

李耘叟

名芸子號芳洲昭武人石屏序其詞最稱
賞予懷渺渺以下數語

木蘭花慢

秋意

占西風早處一番雨一番秋記故國斜陽去年今日落
葉林幽悲歌幾回激烈寄疎狂酒令與詩籌遺恨清商
易改多情紫燕難留嗟休觸緒璽絲抽舊事續何由
奈予懷渺渺羈愁鬱鬱歸夢悠悠生平不如老杜便如

他飄泊也風流寄語庭柯徑菊甚時得棹孤舟

連可久

名久道江湖得道之士也十二歲已能作詩
其父携見熊曲肱適有漁父過前令賦漁父
詞曲肱贈以詩且謂此子富貴中留不住後
果為羽衣多往來西山

清平樂

漁父

陣鴻驚處一網沉江渚落葉亂風和細雨撥棹不如歸

去 蘆花輕汎微瀾蓬窗獨自清閒一覺遊仙好夢任
他竹冷松寒

洪叔璵

名璫自號空同詞客

月華清

春夜對月

花影搖春蟲聲吟暮九霄雲幕初捲誰駕水蟾擁出桂
輪天半素魄映青瑣窗前皓彩散畫欄干畔凝盼見金
波晃漾分輝鵲殿 況是風柔夜暖正燕子新來海棠

微綻不似秋光只照離人腸斷恨無奈利鎖名韁誰為
喚舞裙歌扇吟玩怕銅壺催曉玉繩低轉

水龍吟

追和晁次膺

經年不見書來後期杳杳從誰問梅英蠟小柳枝金嫩
艷陽春近羅幕風柔泛紅浮綠連朝花信念平生多少
情條恨葉鎮長使芳心困 可是風流薄命鏡臺前鬆
鬆蟬鬢茜桃凝粉薰蘭漲膩翠愁紅損縱使歸來燈前
月下恐難相認卷重簾憔悴殘粧淚洗把羅襟搵

驀山溪

憶中都

潮平風穩行色催津鼓回首望重城但滿眼紅雲紫霧
分香解佩空記小樓東銀燭暗綉簾垂昵昵凭肩語
關山千里垂柳河橋路燕子又歸來但惹得滿身花雨
彩箋不寄蘭夢更無憑燈影下月明中魂斷金釵股

齊天樂

閨思

轆轤聲破銀床凍霜寒又侵鴛被皓月疎鐘悲風斷漏
驚起畫樓人睡銀屏十二歎塵滿絲簧暗消金翠可恨

風流故人迢遞隔千里
相思情緒最苦舊歡無續處
魂夢空費斷鴈無情離鷺有恨空想吳山越水花樵玉
悴但翠黛愁橫紅鈿淚洗待剪江梅倩人傳此意

菩薩蠻

宿水口

斷虹遠飲橫江水萬山紫翠斜陽裏繫馬短亭西丹楓
明酒旗
浮生長客路事逐孤鴻去又是月黃昏寒燈
人閉門

又

湖上

吳姬壓酒浮紅蟻少年未飲心先醉駐馬綠楊陰酒樓
三月春相看成一笑遺恨知多少回首欲魂銷長橋
連斷橋

踏莎行

別意

滿滿金盃垂垂玉筋離歌不放行人去醉中扶上木蘭
船醒來忘却桃源路帶綰同心釵分一股斷魂空草
高唐賦秋山萬疊水雲深茫茫無著相思處

瑞鶴仙

離筵代意

聽梅花吹動涼夜何其明星有爛相看淚如霰問而今
去也何時會面匆匆聚散恐便作秋鴻社燕最傷情夜
來枕上斷雲零雨何限且念人生萬事回首悲涼都
成夢幻芳心繾綣空惆悵巫陽館況船頭一轉三千餘
里隱隱高城不見恨無情春水連天片帆似箭

浪淘沙

別意

花霧漲冥冥欲雨還晴薄羅衫子正宜春無奈金宵鴛
帳裏身是行人別酒不須斟難洗離情絲鞘如電紫

騶鳴腸斷畫橋芳草路月曉風清

南柯子

新月

柳浪搖晴沼荷風度晚簷碧天如水印新蟾一罇清光
斜露玉纖纖寶鏡微開匣金鈎半押簾西樓今夜有
人忺應倚粧臺低照畫眉尖

永遇樂

送春

歌雪徘徊夢雲溶曳欲勸春住薄倖楊花無端杜宇抵
死催教去參差煙岫千回百匝不解禁春歸路病厭厭

那堪更聽小樓一夜風雨
金釵鬪草玉盤行菜往事
了無憑據合數松兒分香
怕子總是牽情處小桃朱
戶題詩在否尚憶去年崔
護綠陰中鶯鶯燕燕也應
解語

謁金門

春晚

風共雨催盡亂紅飛絮百計留春春不住杜鵑聲更苦
細柳官河狹路幾被嬋娟相誤空憶墜鞭遺扇處碧
窗眉語度

菩薩蠻

春感

玉琴不療文園病對花長抱深深恨恨入鬢霜邊才情
輸少年蛾眉梳墮馬翠袖薰蘭麝醉夢未全醒綠窗
啼曉鶯

阮郎歸

壬辰邵武試燈夕

東風吹破藻池冰晴光開五雲綠情紅意兩逢迎扶春
來遠林花艷艷玉英英羅衣金縷明鬧蛾兒簇小蜻
蜓相呼看試燈

行香子

代贈

楚楚精神楊柳腰身是風流天上飛瓊凌波微步羅襪
生塵有許多嬌許多韻許多情 十年心事兩字眉婚
問何時真箇行雲秋衾半冷窗月窺人想為人愁為人
瘦為人顰

鷓鴣天

情景

意態嬋娟畫不如瑩然初日照芙蓉笑捐瓊佩遺交甫
肯把文梭擲幼輿 花上蝶水中鳬芳心密意兩相於
情知不作庭前柳到得秋來日日疎

黃叔暘

名晏號玉林又號花菴

賀新郎

題雙溪馮熙之交游風月之樓

倦整摩天翼笑歸來點畫亭臺按行泉石落落元龍湖
海氣更著高樓百尺收攬盡水光山色曾駕飈車蟾宮
去幾回批借月支風敕斯二者慣相識 玲瓏窗戶青
紅濕夜深時寒光爽氣洗清肝曷似此交游真灑落判
與升堂入室有萬象來為賓客不用笙歌輕點澆看仙

翁手搦虹霓筆吟思遠兩峰碧

樓對兩峯甚奇

又

乙巳正月十日雙溪携酒遺蛺蝶亭桃花方開主人浩歌酌客歡甚即席作此

風送行春步漸行行山回路轉入雲深處問訊花梢春
幾許半在詩人杖屨點點是祥煙膏露中有瑤池千歲
種整嚴粧來作巢仙侶相嫵媚試凝竚風流座上揮
談麈更多情多才多調緩歌金縷起取芳時同宴賞莫
惜清樽緩舉有明月隨人歸去從此一春須一到願東
君長與花為主泉共石聞斯語

又菊

莫恨黃花瘦正千林風霜搖落暮秋時候晚節相看元
不惡采采東籬獨秀試攬結幽香盈手幾劫修來方得
到與淵明千載為知舊同冷淡比蘭友 柴桑心事君
知否把人間功名富貴付之塵垢不肯折腰營口腹一
笑歸歟五柳悵此意而今安有若得風流如此老也何
妨相對無杯酒詩自可了重九

又梅

自掃梅花下問梢頭冷葉疎疎幾時開也間者濶焉今
久矣多少幽懷欲寫有誰是孤山流亞香月一聯真絕
唱與詩人千載為嘉話餘興味付來者清癯不戀華
亭榭待與君白髮相親竹籬茅舍喜甚今年無酒禁溜
溜小槽壓蔗已準擬雪天霜夜自醉自吟仍自笑任解
冠落珮從嘲罵書此意寄同社

木蘭花慢

題馮雲月玉連環詞後

自沈香夢斷風雨外失餘春悵袍錦淋漓金鑒論奏四

海無人蛾眉古來見妬奈昭陽飛燕亦成塵惟有空梁
落月至今能為傳神神遊八表跨長鯨誰是再來身
愛雲月溪頭玉環一曲筆力千鈞人間不堪著眼但香
名百世尚如新乞我九霞蜚珮梯空共上秋旻

又

乙巳病中

問潘郎兩鬢更禁得幾番秋悵病骨臞臞幽懷渺渺短
髮颼颼雲邊一聲長笛這風情都屬趙家樓欹枕困尋
藥裏熏衣慵訊香篝悠悠老矣復焉求何止賦三休

念少日書魔中年酒病晚歲詩愁已攀桂花作證便從
今把筆一齊勾只有煙霞痼疾相陪風月交游

又懷舊

問春春不語謾新綠滿芳洲記歷歷前遊看花南陌命
酒西樓東風翠紅圍繞把功名一笑付糟邱醉裏了忘
身世吟邊自負風流風流莫莫復休休白髮漸盈頭
悵十載重來畧無歡意惟有閑愁多情向人似舊但小
桃婀娜柳纖柔望斷殘霞落日水天拍拍飛鷗

南柯子

丁酉清明

天上傳新火人間試袂衣
定巢新燕覓香泥不為綉簾
朱戶說相思側帽吹飛絮
憑欄送落暉粉痕銷淡錦
書稀怕見山南山北子規啼

又

丙申重九

蘭佩秋風冷茱囊曉露新
多情多感怯芳辰強折黃花
來照碧鱗鱗落帽參軍醉
空樽靖節貧世間那復有
斯人目送歸鴻西去一傷神

行香子

梅

寒意方濃暖信才通是晴陽暗拆花封冰霜作骨玉雪
為容看體清癯香淡佇影朦朧孤城小驛斷角殘鐘
又無邊散與春風芳心一點幽恨千重任雪霏霏雲漠
漠月溶溶

賣花聲

己亥三月一日

鶯蝶太多惱殺衰翁牡丹開盡狀元紅俯仰之間增
感慨花事成空垂柳綠陰中粉絮濛濛多情多病轉

疎慵不是東風孤負我負東風

又憶舊

秋色滿層霄剪剪寒飈一襟殘照兩無聊數盡歸鴉人不見落木蕭蕭
往事欲魂銷夢想風標春江綠漲水平橋側帽停鞭沽酒處柳軟鶯嬌

長相思

秋懷

天悠悠水悠悠月印金樞曉未收笛聲人倚樓
蘆花秋蓼花秋催得吳霜點鬢稠香箋莫寄愁

又 秋夜

砧聲齊杵聲齊金井欄邊敗葉飛
夜寒烏不棲 風淒淒
淒露淒淒影轉梧桐月已西
花冠窗外啼

又 春晚

惜春歸愛春歸脫了羅衣著
苧衣綠陰黃鳥啼 酒醒
時夢醒時清簟疎簾一局棋
丁東風馬兒

感皇恩 送饒溪臺遊浙

騎鶴上揚州腰纏十萬拈起詩人舊
公案看山看水此

去勝遊須徧煩君收拾取歸吟卷
少日風流暮年蕭散佳處何妨小留款
沙河塘上落日綉簾爭捲也須拂
拭起看花眼

蝶戀花

春感

百計留春春不住褪粉吹香日日催教去
心事欲憑鶯語訴流鶯剗地無憑據
綠玉闌干圍綺戶一點柔紅應
在深深處想倚翠簾吹柳絮淺顰惆悵芳期誤

月照梨花

閨怨

晝景方永重簾花影好夢猶酣鶯聲喚醒門外風絮交
飛送春歸 修蛾畫了無人問幾多別恨淚洗殘粧粉
不知郎馬何處煙草萋迷鷓鴣啼

摸魚兒

為遺蛻山中桃花作寄馮雲月

問山中小桃開後曾經多少晴雨遙知載酒花邊去唱
我舊歌金縷行樂處正蝶遶蜂圍錦綉迷無路風光有
主想倚杖西阡停杯北望望斷碧雲暮 花知道應倩
蜚鴻寄語年來老子安否一春一到成虛約不道樹猶

如此煩說與但歲歲東風粧點紅雲塢劉郎老去待有
日重來同君一笑拈起看花句

水龍吟

贈丁南隣

少年有志封侯彎弓欲挂扶桑外一朝斂縮蕭然清興
了無拘礙袖裏陰符枕中鴻寶功名蟬蛻看舌端霹霹
劇談玄妙人間世疑無對閨苑醉鄉佳處想當年綠
陰猶在羣仙寄語不須點勘鬼神功罪碧海千尋赤城
萬丈風高浪快待踞龜食蛤相期汗漫與煙霞會

西河

已亥秋作

天似洗殘秋未有寒意何人短笛弄西風數聲壯偉倚
欄感慨展雙眸離離煙樹如薺少年事成夢裏客愁
付與流水筆牀茶具老空山未妨肆志世間富貴要時
賢深居宜有餘味大江東去日西墜想悠悠千古興
廢此地閱人多矣且揮絃寄興氛埃之外目送蜚鴻歸
天際

清平樂

宮怨

珠簾寂寂愁背銀缸泣記得少年初選入三十六宮第
一當時掌上承恩而今冷落長門又是羊車過也月
明花落黃昏

又宮詞

深深禁籞霽日明鸞羽風動槐龍交翠舞恰恰花陰亭
午一簾暖絮悠颺金爐旋炷沉香天子方看諫疏內
人休鬪新粧

酹江月

戲題玉林

玉林何有有一灣蓮沼數間茅宇斷塹疎籬聊補葺那
得粉牆朱戶禾黍秋風雞豚曉日活脫田家趣客來茶
罷自挑野菜同煮多少甲第連雲十眉環座人醉黃
金塢回首邯鄲春夢破零落珠歌翠舞得似哀翁蕭然
陋巷長作溪山主紫芝可採更尋巖谷深處

酹江月

夜涼

西風解事為人間洗盡三庚煩暑一枕新涼宜客夢飛
入藕花深處水雪襟懷琉璃世界夜氣清如許劃然長

嘯起來秋滿庭戶 應笑楚客才高蘭成愁悴遺恨傳
千古作賦吟詩空自好不直一杯秋露淡月闌干微雲
河漢耿耿天催曙此情誰會梧桐葉上疎雨

浣沙溪

醺壇

鐘磬泠泠夜未央梨花庭院月如霜步虛聲裏拜瑤章
紫極清都雲渺渺紅塵濁世事茫茫未知誰有返魂
香

鷓鴣天

暮春

沈水香銷夢半醒
斜陽恰照竹間亭
戲臨小草書團扇
自揀殘花插淨瓶
鶯宛轉燕丁寧
晴波不動晚山青
玉人只怨春歸去
不道槐雲綠滿庭

又

張園作

雨過芙蕖葉葉涼
摩挲短髮照橫塘
一行歸鷺拖秋色
幾樹鳴蟬餞夕陽
花側畔柳旁相微雲澹月又昏黃
風流不在談鋒勝
袖手無言味最長

秦樓月

秋夕

心如結西風老盡黃花節黃花節塞鴻聲斷冷煙淒月
漢朝陵廟唐宮闕興衰萬變從誰說從誰說千年青
史幾人華髮

重疊金

壬寅立秋

西風半夜驚羅扇蛩聲入夢傳幽怨碧藕試初涼露痕
啼粉香 清水凝簾竹不許雙鴛宿又是五更鐘鴉啼
金井桐

又 冬

南山未解松梢雪，西山已挂梅梢月。說似玉林人，人間無此清。
此身元是客，小住娛今夕。拍手凭闌干，霜風吹鬢寒。

又

除日立春

銀幡綵勝參差剪，東風吹上釵頭燕。一笑繞花身，小桃先報春。
新春今日是，明日新年至。擘繭莫探官人，間行路難。

謁金門

初春

花事淺方費化工勻染牆角紅梅開未徧小桃才數點
人在暮寒庭院閒續茶經香傳酒思如水詩思嬾雨
聲簾不捲

南鄉子

夏夜

多病帶圍寬未到衰年已鮮歡夢破小樓風馬響珊珊
缺月無情轉畫欄涼入苧衾單起探燈花夜欲闌書
冊滿床空伴睡慵觀拈得漁樵笛譜看

又

夜景

萬籟寂無聲，衾鐵稜稜近五更。香斷燈昏吟未穩，淒清
只有霜華伴月明。應是夜寒凝惱得，梅花睡不成。我
念梅花花念我，關情起看清冰滿玉鉶。

花發沁園春

芍藥會上

曉燕傳情午鶯喧，夢起來檢校芳事。荼蘼褪雪，楊柳吹
綿，迤邐麥秋天氣。翻階倚砌看芍藥，新粧嬌媚正鳳紫。
勻染綃裳猩紅輕透，羅袂晝煖朱闌困倚。是天姿妖
嬈不減姚魏，隨蜂惹粉，趁蝶棲香，引動少年情味。花濃

酒美人正在翠紅圍裏問誰是第一風流折花簪向雲
髻

阮郎歸


微姜堯章體

粉香吹暖透單衣金泥雙鳳飛閒來花下立多時春風
酒醒遲 桃葉曲柳枝詞芳心空自知湘臯月冷佩聲
微鴈歸人不歸

鵲橋仙

青林雨歇珠簾風細人在綠陰庭院夜來能有幾多寒

已瘦了梨花一半 寶釵無據玉琴難托合造一襟幽
怨雲窗霧閣事茫茫試與問杏梁雙燕



花菴詞選續集卷十